

- विधानसभा मांय लारला दिनां ऊं चाल रही रार खत्म व्ही—आला नेतावां बीचे चर्चा पाछे कांग्रेस रा विधायक सदन री कार्यवाही मांय शामिल व्हयो।
- एशिया—प्रशांत हलका मांय थी आर अर सर्कुलर इकोनॉमी रो 12वाँ क्षेत्रीय फोरम तीन मार्च ऊं जयपुर मांय व्हेला।
- प्रदेश मांय न्यारा—न्यारा केन्द्रां माथे आज पैला दिन रीट रो इम्तिहान शांति सागे व्हयो— तीजी पारी री परीक्षा काल संवारे व्हेला।
- राज्य रा केई हलकां मांय मौसम ओजू बदल्यो— छह जिलां मांय आंधी—बारिश रो येलो अलर्ट।

000

विधानसभा मांय पख अर विपख रा सदस्यां बीचे लारला दिनां ऊं चाल रही रार आज खत्म व्हे ग्यी। सत्ता पख अर विपख रा आला नेतावां बीचे व्ही चर्चा पाछे कांग्रेस रा विधायक सदन री कार्यवाही मांय शिरकत कीनी। ई बारा मांय आज सदन रा नेता अर मुख्यमंत्री भजनलाल शर्मा विपख रा नतावां सागे बातचीत कीनी, ज्यीं पाछे रार खत्म करण माथे सहमति बणी। ई पाछे सदन मांय विपख रा 6 सदस्यां रो निलम्बन रद्द करण रो प्रस्ताव पास करी ज्यो। बाद मांय सदन री कार्यवाही मांय शिरकत करता थकां विपख रा नेता टीकाराम जूली मुख्यमंत्री रो आभार जतायो।

000

एशिया—प्रशांत हलका मांय थी आर अर सर्कुलर इकोनॉमी रो 12वाँ क्षेत्रीय फोरम जयपुर मांय तीन मार्च ऊं व्हेला। ई बारा मांय आज जयपुर मांय राख्यी ज्यी प्रेस कॉन्फ्रेंस मांय केन्द्रीय आवासन अर शहरी विकास कार्य राज्यमंत्री तोखन साहू बतायो के तीन दिन रा ई आयोजन रो लक्ष्य कार्बन तटस्थिता हासिल करण सारु सर्कुलर सोसायटीज़ ने आकार देवणो है। श्री साहू बतायो के ओ कार्यक्रम सर्कुलर इकोनॉमी ऊं जुडी कोशिशां ने आगे बधावण माथे चर्चा करण अर अंतर्राष्ट्रीय स्तर रा जाणकारां ने एके सागे लावण रो मंच बणेला।

ई मौके स्वायत्त शासन मंत्री झावर सिंह खर्रा कहयो के ई आयोजन ऊं प्रदेश रा शहरां ने साफ—बणावण री नुवी प्रेरणा मिलेला। वे कहयो के वां रो महकमो फोरम री तैयारियां मांय पूरी मदद कर रहयो है।

ध्यानजोग है के यू.एन.सी.आर.डी. री ओर ऊं साल 2008 मांय सरु करी ज्या ई फोरम रो मकसद एशिया—प्रशांत हलका मांय सरकारी कारिंदां ने तीन आर अर सर्कुलेरेटी ने मुख्य धारा मांय लावण सारु नीतिगत इनपुट देवणो है। फोरम रो आयोजन आवासन अर शहरी कार्य मंत्रालय रा स्वच्छ भारत मिशन—शहरी री ओर ऊं जापान रा पर्यावरण मंत्रालय री मदद ऊं करयो जा रहयो है, जिण मांय राजस्थान सरकार ई मदद कर रही है। सम्मेलन मांय 500 ऊं बत्ती अंतर्राष्ट्रीय अर घरेलू प्रतिभागियां रे सिरकत करण रा आसार है।

000

प्रदेश मांय पंचायतां रा ओजू गठन सारु बणायी ज्यी समिति री पहली मीटिंग आज जयपुर मांय पंचायतीराज मंत्री मदन दिलावर री सदारत मांय व्ही। मीटिंग मांय न्यारा—न्यारा जिला ऊं मिल्या प्रस्तावां री जाणकारी लीरीजी। इण मांय समिति रा सदस्य गृह राज्य मंत्री जवाहर सिंह बेढम, खाद्य अर नागरिक आपूर्ति मंत्री सुमित गोदारा, सामाजिक न्याय अर अधिकारिता मंत्री अविनाश गहलोत अर चिकित्सा मंत्री गजेंद्र सिंह खींवसर, समिति रा सचिव अर पंचायती राज विभाग रा शासन सचिव जोगाराम ई शिरकत कीनी।

000

शिक्षा मंत्री मदन दिलावर कहयो है के देश ने विकसित बणावण रा काम मांय नौजवानां रो खास काम है। वे आज जयपुर रा एक गैर—सरकारी विश्वविद्यालय मांय राख्यी ज्या राजस्थान विज्ञान महोत्सव मांय बोल रहया हा। शिक्षा मंत्री नौजवानां ऊं विज्ञान अर प्रौद्योगिकी रा हलका मांय नुवा प्रयोग करता थकां दुनियाभर मांय होशियारी रो दरसाव करण बाबत् कहयो।

ई मौके भारतीय राष्ट्रीय विज्ञान अकादमी रा अध्यक्ष प्रोफेसर आशुतोष शर्मा, विषय विशेषज्ञ अर मोटी तादाद मांय विद्यार्थी अर शोध करण वाळा मौजूद रहया। ध्यानजोग है के भारत रा महान वैज्ञानिक सी. वी. रमन री खोज 'रमन प्रभाव' री याद मांय हर साल 28 फरवरी ने राष्ट्रीय विज्ञान दिवस मनायो जावे है।

000

माध्यमिक शिक्षा बोर्ड री ओर ऊं आज राज्य मांय न्यारा—न्यारा केन्द्रां माथे राजस्थान अध्यापक पात्रता परीक्षा—रीट लीरीजी। बोर्ड रा सचिव कैलाश चन्द्र शर्मा बतायो के दो पारियां मांय लीरीजी आ परीक्षा देवण सारु 14 लाख ऊं बत्ता विद्यार्थी नाम मंडाया हा। वे बतायो के दो दिन री ई परीक्षा रा पहला दिन आज शांति रही।

000

अमृत भारत स्टेशन योजना रा तैत डीग मांय रेलवे टेशन ने और बेहतर बणावण रो काम कर्यो जा रहयो है। संभागीय प्रबंधक (संचालन) प्रशस्ति श्रीवास्तव बतायो के ई योजना रा तैत आगरा मंडल रा डीग समेत 15 टेशनां ने और बेहतर बणाया जा रहया है। डीग टेशन माथे 14 करोड़ 30 लाख रुप्या रा खर्च ऊं प्लेटफॉर्म अर शेड बणावण, एनाउंसमेंट सिस्टम अर रिजर्वेशन काउन्टर बणावण सरीखा काम कराया जा रहया है।

000

जैसलमेर मांय आज चार दिन रो आरोग्य मेळो सरु व्हयो। जिला प्रशासन अर आयुर्वेद विभाग री ओर ऊं लगाया जा रहया संभाग स्तर रा ई मेळा मांय आयुर्वेद अर योग सागे प्राकृतिक, यूनानी अर होम्योपैथी तरीका ऊं मरीजां रो मुफ्त इलाज कर्यो जा रहयो है। आयुर्वेद विभाग रा अतिरिक्त निदेशक डॉ. राजीव लोचन बतायो के मेळा मांय आयुष री न्यारी—न्यारी विधावां अर थेरेपियां रे जरिये इलाज कर्यो जा रहयो है।

000

सीकर ज़िला रो नामी खाटूश्याम जी मेळो काल सरु छेला। ई मेळा सारु ज़िला प्रशासन अर मंदिर समिति री ओर ऊं ज़रुरी इंतज़ामात् करी ज्या है। एस.पी. भुवन भूषण यादव बतायो के मेळा मांय आवण वाल्भ जातरुआं अर वाहन चालकां रा सुबीता सारु खास व्यवस्थावां करी ज्यी है।

000

राज्य मांय केई ठोडां मौसम ओजू बदल्यो है अर जयपुर समेत ऊगणी हलका रा ज़िलां मांय केई ठोडां बादला मंड्या रहयो। भरतपुर मांय दोपहरां पाछे छांटो—छिड़को व्हयो। पाली अर जालौर मांय मौसम सुहावणो रहयो। सरहदी जिलां जैसलमेर अर बाड़मेर मांय आखा दिन बादला मंड्या रहयो। मौसम केंद्र जयपुर रे मुजब बीकानेर, श्रीगंगानगर, हनुमानगढ़, चूरू, झुंझुनूं अर सीकर ज़िलां मांय आवता दो दिन आंधी चालण अर बिरखा व्हेवण रा आसार हैं। ई रे अलावा न्यारा—न्यारा ज़िलां मांय पारा मांय उतार—चढ़ाव री संभावना है। महकमा रे मुजब राज्य रा आतूणी हलकां मांय गर्मी रो असर और बधबा री संभावना है।

000

कोटपूतली—बहरोड़ जिला मांय आधार कार्ड बणावण अर वां मांय बदलाव करण रो सुबीतो मुहैया करावण सारु आज डाक विभाग री ओर ऊं खास शिविर लगायी ज्यो। शिविर मांय सुकन्या समृद्धि योजना समेत डाक महकमा री न्यारी—न्यारी बचत योजनावां री जाणकारी ई दीरीजी। ज़िला रा शाहपुरा अर कोटपूतली पोस्ट ऑफिस मांय ई दो—दो खास आधार काउंटर लगायी ज्या। ई रे अलावा ब्लॉक लेवल माथे ई शिविर लगायी ज्या।

000

झंगरपुर रा जिला कलेक्टर अंकित कुमार सिंह कृषि पर्यवेक्षकां अर कृषि अधिकारियां ने ई—गिरदावरी रा काम मांय तेज़ी लावण रा हुकम दीना है। वे आज कृषि विभाग रा अहलकारां सागे मीटिंग कर र विभागीय योजनावां रो जायजो लीनो। जिला कलेक्टर सहायक कृषि अधिकारियां ने सरकारी योजनावां री जाणकारी किसानां तांई पूगावण बाबत् कहयो।

000